

INUIT ATAQATIGIIT

INATSISARTUNI



UKA16/59

Mimi Karlsen

Meeqqat atuarfianni angajullit atuartinneqarnerini MMS imaluunniit nittartakkakut naapittarfikkut tamataqanngitsunik assinik avitseqatigiittarnermut tunngasunik paasissutissiisarneq eqqunneqarnissaannut Naalakkersuisut peqquneqarnissaannut aalajangiiffigisassatut siunnersuut.

(Inatsisartunut ilaasortaq Tillie Martinussen, Demokraatit)

Inuit Ataqatigiit Tillie Martinussen qutsavigiumavaat meeqqat atuarfiani atuartut angajullit tamataqanngitsunik assinik avitseqatigiittarnermut tunngasunik paasissutissiisarneq qulakkeerumammagu.

Isumaqarpuguttaaq uagut angajoqqaatut, inersimasutut ilinniartitsisutulluunniit pisussaaffeqartugut meerartagut oqaluttuutissallugit nittartakkani attaveqatigiiffiusuni suut ulorianartuunersut suullu sillimaffigisassaanersut. Meerartagut nittartakkatigut sorpassuarnik ussiataarneqarsinnaasarpur, ussasaarutit, pilerisaarinerit imaluunniit qingasaarinerit mamiatsannarsinnaasut naammattoorsinnaasarpaat. Taamaammat inersimasutut pisussaaffeqarpugut nittartakkani allaqatigiiffiusinnaasuni meerartatta peqataaffii pillugit alapernaallutalu oqaloqatiginnissalluta, oqaloqatigissallugit suut ulorianarnersut suullu mianersorfigissaneraat. Uagut inersimasuusugut iliuuseqartuusariaqarpugut meeqqatsinnillu illersuilluartariaqarluta.

Meeqqat atisaqarani assinik nittartakkanut allaqatigiiffiusartunut ikkussisannginnissaannik oqaanniartugit periarfissat arlaqarpur. Paasisitsiniaanerit piareersarluakkat ingerlanneqarsinnaappur. Paarisa iluatsilluartunik meeqqat inersimasullu oqaloqatigiissutigisinnaasaannik atuagassiannguanik sanasarnikuuppur. Inersimasut meeqqallu atuarnermikkut oqaloqatigiissutigisinnaavaat, taamalu inersimasunit atoqatigiinninniarpasittumik qaninngoornerit qanoq itigartinneqarsinnaanerit oqaloqatigiinnikkut iliuuseqarfisigisinnaangussallugu. Mattaangalluni assinik ikkussisannginnissaq paasisitsiniutigineqarsinnaavoq taama ittunik atuagassiannguanik sananikkut.

Soorlu Naalakkersuisut akissuteqaatiminni oqaaseqartut kinguaassiutit pillugit atuartitsisoqartussaavoq. Tassanilu atuartitsinermi mattaangalluni assinik nassitsisarnerup ulorianassusianik atuartitsisoqarsinnaalluni.

Siunnersuut taperserparpur Naalakkersuisullu Atuarfik pillugu inatsimmik nutartikkamik Inatsisartut 2017-imi ukiakkut ataatsimiinneranni saqqummiinissaat qilanaaralugu. Tassunga atatillugu aamma pilersaarutaavoq alloriarfinni siunertat atuartitsissutit pillugit nalunaarut atuartitsinermi anguniakkat nutaat ilanngullugit nutarterneqassasoq, sammisarlu nalunaarutip taaneqartup nutarternissaani ilanngunniarmassuk.